

Medienmitteilung der Gemeinde Surses (Nr. 09-2016)

Surses: Igl cumegn investescha bung 7.3 milliuns an infrastruttura e turissem

La radunanza communal da glindesde seira ò approvo cun fitg gronda maioritad igl preventiv pro 2017. Igl chint current prevei en surple d'antradas da radond 3.3 milliuns francs. Las investiziuns bruttas montan a 7.3 milliuns francs. Igl pe da taglia resta venavant sen 100% dalla taglia simpla digl cantun Grischun.

Tar antradas da radond 29.9 milliuns francs ed expensas da radond 26.6 milliuns francs prevei igl cumegn da Surses en surple d'antradas da radond 3.3 milliuns. Igl cash-flow è tar radond 4.8 milliuns francs, uscheia tg'igl cumegn è er bung dad investir. Las investiziuns bruttas montan a 7.311 milliuns francs e pertotgan d'ena vart l'infrastructura communal cun la sanaziun da veias e dad ovras communalas. Investo vign pero er pigl turissem. Uscheia ò igl suveran gio delibero glindesde seira tranter oter en credit dad 1.27 milliuns francs per realisar igl center da cursa lunga a Rona. Igl project vign exequia sur igls proxims 3 onns. Gl'è previa dad optimar igl traject da cursa lunga existent, d'annavar ena part dalla loipa e da construeir en bietg cun duschas e sacrets ed ena garascha per la maschina da far loipas. Aint igl preventiv d'investiziun è ultra da chegl er risguardo igl project per la construcziun d'ena «stanza da gôt Lareschs» a Savognin. Cun chella stanza da gôt ins vottigl declarar a persungas interessedas la muntada digl gôt an tot las sias facetts. Ella duess star a disposiziun a scolas, interpresas, seminars, etc. Per la planisaziun dalla « stanza da gôt » è nia scretg or ena concorrenza tar architects indigens. Igl resultat dalla concorrenza n'è betg anc ancunaschaint. Igl costgs per la realisaziun montan a 650'000.00 fr. L'approvaziun necessaria digl credit ò la radunanza communal anc mess anavos pigl mument, cun l'incumbensa alla suprastanza da surluvrar igl project resp. d'examinar anc enda igl li exact. Igl project surluvro ò damai da neir sottamess l'otr'onn anc eneda alla radunanza communal per approvaziun.

Ulteriouras decisiuns

La radunanza communal ò decidia cun 115 vuschs e sainza cuntervusch da lascher igl pe da taglia sen 100% dalla taglia simpla digl cantun Grischun. Ultra da chegl ò igl suveran decidia da fixar nignas restricziuns pertutgont las quotas per la vendita d'immobiglias ad esters pigl 2017, tenor la practica actuala.

Ulteriouras infurmaziuns dat igl mastral Leo Thomann (tel. 079 405 96 73)

Savognin, igls 28 da november 2016